

石

渠

餘

紀

石渠餘紀目錄

卷一

紀節儉

紀賑貸

紀免科

紀蠲免

紀災蠲

紀免徭役

紀河夫河兵

紀科舉篇目

紀科舉加恩

紀滿州科舉

紀進士

授官  
中額

紀殿試 朝考

紀舉人

附  
授官  
貢監

紀制科特舉

紀武舉

紀薦舉

附  
吏員  
舊例

幕賓  
薦舉  
會推  
舊制

卷二

紀廕子

紀科道

互見行取  
紀起廢起病  
始

紀行取舊制

紀京察

甄別京  
官附

紀吏治

紀守令

附紀引  
見  
召見守令

紀考試月官舊制

月選官謂之月官

紀大計

互見京  
察篇

京營表序

紀列朝各省兵數

附論

列朝直省兵額表

紀軍政

卷三

紀裁十三衙門

紀立內務府

始錄國初聖諭

紀停編審

紀丁額

除籍爲良

紀賦冊糧票

歷朝田額糧賦總目

紀丁隨地起

直省地丁表

通考京師用額

紀會計

紀耗羨歸公

附公廉

直省歲入總數表

直省歲出總數表

部庫年例  
應放數目

直省出入歲餘表

河工  
另案

卷四

紀庫

紀漕糧

漕糧  
倉耗

紀漕船運軍

紀漕運官司期限

紀罷漕折

附記

紀探辦

紀屯田

附記井田  
祭田學圖

紀勸墾

紀蘆課

附丈  
量

紀常平倉額

紀官倉

紀社倉義倉

紀平糶

互見各篇  
倉邊倉營倉籠倉

附記旗

紀糶

紀五城米局

附人旗  
米局

紀鄰穀協濟

截漕

紀圈地

紅冊餘  
紀地畝

紀旗人生計

附入旗賬務  
不許增租隻佃  
官莊旗租  
停設莊頭  
盛京官莊  
不准莊頭

退換  
地畝

紀牧場

口外  
牧場

卷五

紀制錢品式

紀戶部局鑄

鑄大錢  
說帖

紀銀錢價直

紀錢銅禁令

紀銅政

附載鉛錫  
附載新疆西藏錢

附載洋錢  
附載銅運改道議

紀礦政

紀硝礦

紀鹽法

紀引課

直省鹽課表

紀鹽禁

紀河東鹽法篇上

紀河東鹽法篇中

附記

紀河東鹽法篇下

附記

附江西建  
昌鹽政  
論旨

紀恤商井

並範  
引

紀茶引

紀禁酒

卷六

紀關稅

直省關稅表

工部五關稅課表

紀雜稅

紀米糧稅

紀邊外互市

紀海舶米糧

紀市舶

紀英夷入貢

附記渤海圖說

敷諭英吉利國王二道

生先生跋

附道光二十一年天津添兵原案

附海商水程單子

附曾滌

紀幾輔營田水利

附永定河宜復故道論

紀鐵斛鐵尺

石渠餘紀卷一

閩縣王慶雲敬述

紀節儉

我朝起自東陲尊尚樸質歷傳以來繼序不忘用能宮府服御無侈飾無冗費昭儉德以示子孫謹案順治八年以督催織造官役騷擾驛遞罷之停陝西織造裁羯粧蟒郤江西造進龍盤十一年以江浙連年水旱停織造二年聖祖常諭本朝自入關以來外廷軍國之費與明代略有彷彿至宮中服用則以各官計之尚不及當時妃嬪一宮之數三十六年之間尚不及當時一年所用之數康熙

二十九年 上以前明宮殿樓亭門名并 慈甯宮 窯  
壽宮 乾清宮及老嫗數目宣示外廷 諭天旱欲減宮  
人及所用器物因自來未嘗有餘故不能再減飭羣臣將  
故明宮中用度察閱尋廷臣奏查故明宮內每年用金花  
銀九十六萬餘兩今悉充餉光祿寺送內用二十四萬餘  
兩今止三萬兩每年木柴二千六百餘萬斤今止七八萬  
斤紅螺炭一千二百餘萬斤今百餘萬斤各宮牀帳輿轎  
花毯之屬二萬餘兩俱不用故明宮殿樓亭門名七百八  
十六座今不及十分之三至各宮殿基址牆垣軾用臨清  
木用楠木今 禁中修造出於斷不得已第用常輶松木

而已我皇上撙節儉約至矣極矣時光祿寺年用銀十萬兩工部二三十萬兩較前朝省十之九見四十五年諭旨而

上猶以工部每月輒用數萬兩諭以內廷除賞賜外一應工作費用月不及千兩三十九年九月諭工部四十九年又諭

曰萬歷以後內監有在御前服役者故明季事蹟知之獨詳明朝費甚奢工作亦廣宮中脂粉錢四十萬兩供應數百萬兩世祖登極始悉除之紫禁城內鋪地輒橫豎七層工作俱派民間今器用樸素工作皆見錢雇覓明季宮人九千人內監十萬人飯食不能徧及日有餓死者今宮中不過四五百人而已先是光祿寺歲用六七十萬工部

百餘萬 聖祖末年光祿寺年用四五萬工部十五萬餘  
是以部庫有五千餘萬之積雍正四年 諭朕宮中食餘  
之物皆不忍棄必令人檢貯數年以來米粟至數十石之  
多五年 諭曰前織造衙門所進御用繡線蟒袍至九件  
之多燈幃加以綵繡卽切加戒諭近端節進繡扇此皆糜  
費於無益之地朕所不取并 諭工匠造物之情喜新好  
異見一靡麗式樣初則競相摹效後必出奇鬪勝雕文纂  
組古人所斥爲奇裏豈可導使爲之而不防其漸又曰器  
服爭尚華巧必多用工匠市肆多一工作之人卽田畝少  
一耕稼之人且羣趨爲工則物之製造必多物多則壅滯

是不但害農而且害工也乾隆初禁奢之令屢下尤以旗人蕩費江浙侈靡爲戒

如旗人喪事粉飾虛文吳下風俗疾病薦賽皆有特諭

自十一年起

六年至四十九年六度南巡及

幸淀祠五臺閣里或

以戶口日增宜敦儉樸或以清蹕所駐不過數日但須

埽除潔淨以供憩宿或禁點綴節景供備龍舟或禁增設

坐落戲臺排當蓋翠華所躡觀民察吏之外又以河工

海塘親授方略雖一遊一豫常日昃不遑且惟恐派累民

間偶見行營以布幕牆卽念及貧民襦袴之用

見三十六年諭旨

皆兢兢以崇實黜華爲念又案二十七年南巡諭曰

名山勝蹟以存其舊規爲得自然之趣卽如浙江龍井山

水自佳何必更興工作此則 皇情所屬更非生長細旃  
廣廈者所知而疆吏如三寶王亶望以添繪屋宇點綴燈  
綵爲足以奉承 上意亦適形其彝俗自取申飭而已

乾隆五十六年 諭曰本朝恭儉相承惠民益下偶有  
行軍征討卽芻餚亦不取之民間是以拓地開疆大功  
屢成雖用兵而民不知兵至宮中嬪御以及給使女子  
合之皇子皇孫乳媼使婢約計不過二百人實從古宮  
闡所未有

紀賑貸

凡賑有賑米有折賑有賑貸大抵極貧民便賑米次貧民

便賑錢稍貧民便賑貸然必視災之重輕與民所緩急而爲之等。國初賑務於旗地加詳簡及直隸康熙九年淮揚水人給米五斗又分設米廠人日一升三日一給自是以後各省賑災大率口日以合計時頻年賑卽發帑數十萬或百萬遺部院堂司官往司其事至被災地廣惟恐恩澤或遺則分命大臣往賑如康熙四十二年賑山東是年凡官民助賑皆與議敘京師三佐領出一人時一千餘佐鎮共得三百人人借與銀三千兩分往各州縣賑給以來爲限。四十九年賑陝甘皆分三路竝賑四十六年以淮揚倉無存穀折給大口月三錢小口半之乾隆四十八年賑糧綏同雍正初每令煮賑與散賑兼行又定勘災給糧有司必親臨

母假手吏胥里甲近城設粥廠四鄉二十里設米廠

米廠照煮

賑之數月給一次八年北河漫溢遣官領帑分四路賑濟乾隆元

年令勘災之吏胥飯食冊籍紙張酌動存公銀兩三年

諭曰學田爲數無多貧生身列膠庠自不便與貧民一例

散賑嗣後遇賑貸之時教官將貧生名籍開送地方官於

存公項內量發交教官均散先是賑濟之米每口日支三

四合至七八合無定數是年定凡賑大口日給五合小口

半之七年定地方凡遇水旱卽行撫卹先賑一月謂之正

賑亦日急賑既察明災分戶口被災六分極貧加賑一月七八

分極貧加兩月次貧加一月九分十分以次遞加一月謂

之加賑或地方積歉或災出非常得將極貧加賑至七八月次貧五六月或賑期已滿而有旨格外加恩者亦謂之加賑凡加賑則正賑時遺漏貧民竝先可餬口而後力不能支者亦得增入雍正十一年諭旨又定山西湖廣貴州不分極貧次貧并省各省又次貧名目臣以爲民有貧富之差固也至於均之貧民均之被災則極貧與次貧其辨甚微況區之以又次貧之目是徒使吏胥上下操縱以市其升合之恩豈朝廷救災意乎舊例夏災不入蠲至是定凡夏災地不兩熟及雖兩熟而秋禾不可種者得照秋災請賑風災如雹災得貸種傷大田者亦以秋災論二十二年

山東江南水 諭曰豫省之夏邑商邱四縣與蕭陽曹單  
災地大旱相錯豈獨無災此中州之民淹樸忠厚不敢言  
災是以賑卹未及益用嘉憫著該撫卹勘明加賑尋 命  
侍郎裘日修往相度疏濬以工代賑引溝塍積水達於河  
自十月至明年二月賑垂畢 諭曰譬如赤子出慈母之  
懷未能強飯遽斷其乳其何以堪其再加賑一月自後加  
賑之外復有展賑或概賑貧民則不分極次或穀食不足  
則本折相兼折價自五錢加至一兩被災重者再加四錢  
攷 純廟之世府庫漸充賑貸之費亦漸廣今舉其大者  
如乾隆七年黃淮交漲石林決口江蘇安徽共賑米二百

四十萬銀七百四十餘萬十二年山東九十州縣大水賑  
米五十餘萬穀四十餘萬銀一百七十餘萬三十五六年  
直隸災用部庫二百二十餘萬通倉及截漕米稱是又撥  
西安藩庫二百萬以賑甘肅四十三年河溢河南四十六  
年江蘇大水各賑銀百六七十萬次年黃河溢三省撥浙  
商佐工銀八十萬濟江南淮商公輸銀二百萬濟山東時  
豐沛曹單災尤甚 命予賑不論月災退始停五十年河  
南旱賑銀二百五十萬五十一年賑安徽撥關稅一百萬  
時河決山安北岸總河李世傑請開捐例以佐工需 上  
不許竝 諭以上年江南等處賑費用至千餘萬部庫尙

存銀七千餘萬五十五年蕭陽水災撥銀百萬又撥運關庫銀百萬以賑之六十年中凡一隅偏災賑費數萬兩至數十萬者不可勝計而履端行慶甲年災區乙年新春加賑蓋歲以爲常嘉慶元年河溢豐汎六堡令先以饅餅乾糧散給災民乃次第賑卹以後多有陝西延安旱加恩每口日給六合亦小口六年六月畿輔大水遣官領部局制錢京倉稷米先於京城散賑又分四路遣大臣前往賑卹惟南路之台費蔭陳霞蔚撫賑最速有旨優敘其冬直隸奏乞賑費百五十萬允之上嘗論外省辦賑之濫不在災民而在吏胥敢有需索冊費致貧民不甘領

賑者罪無赦 奨撫賑深得民心之武清知縣朱杰以橐  
城大城二縣查賑遲延褫其職十九年豫省睢工漫口而  
山東安徽湖北陝甘各省或水或旱山西地震同時舉賑  
於是通政司副使蔣祥墀御史孫世昌胡承珙等各條上  
賑災積弊如委員查災藉端需索藩庫發帑借款扣除造  
冊不核戶口之虛實胥吏易於侵漁設廠不酌道里之遠  
近飢民疲於奔走或浮開折算或早晚失時糶米煮粥則  
攏和沙灰給錢折銀則扣平短串乃 勅各大吏實心督  
率務令實惠及民臣以爲荒政十二司徒第舉其綱若鴻  
雁之何以安集民勞之何以無縱詭隨則有非令甲所能

詳者昔高宗有言積歉之區尤資良牧至哉聖言盡之矣凡貸有籽種有口糧有折貸大約常年之貸遇歉免息歉歲之貸徑免其息見乾隆元年諭雍正四年定收成八分以上石收息一斗七分以上免息六分五分分兩年責償此常賑也乾隆十七年令災民所貸種食夏災貸者秋後責入秋災貸者來年麥收責入均免息此災貸也凡遇災民貸口糧大口三斗小口半之乾隆四十九年大名旱貸籽種畝以四升雍正十一年或五升乾隆三十六年陝西寶雞或畝賑以籽種三升乾隆三十年仁和六縣折給則畝五分乾隆四十一年河九年山東或六分是年河南次年乾隆

臣嘗讀直隸督

臣

方觀承紀曰

賑所以救農也

國家府

庫倉廩之積皆農力也出其所入於豐年者以賑其荒

恩非倖邀也故司賑者必視田畝被災輕重與器用牛具

之有無以別極貧次貧其不因災而貧者則非農也不因

災而貧者亦賑誤以賑爲博施之舉也夫農飢則四民皆

飢穀貴則百物皆貴蓋推廣

恩澤而及之耳非賑政之

本意也故災賑首重賑農其餘乏食之民不過爲區別斯

可矣觀承之論可謂正矣抑

臣猶有說焉農民伏處田野

畏官府如神明不幸遇災有坐而待殍而已其抱牘而泣

請者與聚市而謾謹者必非農也然則如之何而可減糴

以待城市必孤窮者而後賑焉賑貸以待四鄉稍有餘者亦令糴焉庶乎其不遺不濫也乎

又凡地震成災死者傷者廬舍壞者計而賑之康熙二年雲南劍川三十官弁因災身故照巡洋被風例賜卹四年山西平陽官弁同上其風潮霜

三年例凡民間火災准動存公銀兩酌給同上其它風潮霜雹之災皆視水旱以輕重賑卹載在例案茲不具載

### 紀免科

勝朝自正德嘉靖間屢增賦額正供已非其舊神宗之初張居正當國丈量天下民田一時驟增至三百萬頃時居正頗以溢額爲有司爭改小弓以求田多或倍克見田以充虛額於是有一田而兩賦者及

逃絕包賠則又有無田而有賦者萬歷末年戶部尙書李汝華倡加遼餉崇禎初楊嗣昌柄政又加練剿二餉計前後加賦二千萬是爲三餉我朝開國首革除之又除召買津糧

江南淮揚湖北蘄黃流亡荒地悉免其租世祖親政以前此邊外築城加派各省錢糧二百五十餘萬令有司按戶給還除山西荒田二萬八千餘頃西安廢地虛丁銀三萬餘兩康熙元年減免江西南昌七州縣浮糧十四萬九千餘石米折銀十九萬五千餘兩見事例是時移瀕海居民於內地除其賦十年定各官詐報墾荒致民賠累者勘明豁免二十六年除康熙十三年以後加增襍稅除廣東高

州瓊州各屬荒糧四十九年以後屢除浙江荒地銀臣案

國初承明季兵荒之後務墾復以盡地利寬升科期限  
以勸之自功令以勸墾殿最有司而俗吏無招來勸相之  
素但虛張其數以邀功敘荒墾不常職由於此不然則此  
時之民休養安集久矣安所得污萊盈野猶待朝廷之  
免復哉世宗卽位以陝甘額外賦糧錢收三釐斗收三  
合爲備荒之用詔此項徒有加賦之名而無備荒之實  
著永行停止雍正二年免江西南昌等七縣浮糧銀七萬  
五千餘兩會三年從怡親王請除蘇州浮糧三十萬松江  
十五萬箸爲例五年又諭曰各省賦稅最多者莫如江

南之蘇州浙江之嘉湖由明初籍富民之田爲官田按私  
租爲正賦此洪武之刻政也明二百餘年減復不一我  
朝因軍需經費未逮裁減 皇考嘗論及此朕仰體 聖  
心已將蘇松浮糧豁免今特沛恩膏將嘉興額徵四十七  
萬湖州三十九萬減十分之一箸爲例先是阜甯縣之射  
陽湖報升淤地八千餘頃有糧無地逋負纍纍九年乃悉  
除之 高宗卽位 恩詔再除江省浮糧銀二十萬以紓  
民力虹縣桃源之水歸泗州安河入洪澤湖兩岸淤地千  
二百餘頃淹涸不常 詔永除其租會而睢甯宿遷桃源  
先報涸出升科地萬三千餘頃 世宗察其不實已豁地

七千餘頃至是存地五千餘頃比年催徵不前 諭曰此淤出之地卽舊有糧田是以民力維艱輸將不繼著將三縣新淤涸後改科地糧全行蠲免是年湖北之鶴峯長樂新設起科得 旨照容美秋糧原額仍免三年今施南地賦獨輕

二年免甘肅河西馬糧萬餘石九年除四川水決田百九十餘頃租課十一年免慶雲縣額賦十之三著爲令十六年 諭曰朕聞武進陽湖二縣開抵役田一項原係前明虛田領價本戶逃亡株連親族將產開抵小民條糧役租力難竝輸致積年拖欠除條漕外概予豁免時 南巡清問故有是 詔十八年免臺灣風潮衝陷田園五百四十

餘甲山東湖鹹地四百二十頃二十二年減山東武定府  
黎敬等莊窪地四百四十八頃以下則徵租並會典二十九

年免漢陽縣坍田五百餘頃三十一年以漢川縣垸地低

窪改田賦照漁糧科則又 諭曰滇省山多田少可耕之

地俱經墾辟惟山麓河濱尙有曠土貧民耕種以供口食

定例山頭地角三畝以上者照旱田十年之例水濱河尾

二畝以上者照水田六年之例升科第念此等零星地土

本與沃壤不同係地方官經理不善丈量查勘恐吏胥從

中滋擾嗣後滇省山頭地角水濱河尾俱聽民耕種概免

升科憶前在滇省於故廣中見此段爲撫臣麟慶所奏請者蓋必援滇例也三十九年以文

安大窪連絡四淀水占民田定田糧視水潦輕重隨年蠲減後凡畿輔近水之地皆視此免山西豐鎮荒坍旗地五百餘頃四十九年免吳縣無著田千四百餘石五十二三年除河南各屬水衝地百餘頃山西五臺五州縣水坍地百七十餘頃浙江仁和錢塘水坍地五十餘頃五十四年豁免山東曹縣利津壽光三縣廢地五百九拾餘頃會典河南蘭陽考城積年隄侵柳占地銀九千八百餘兩會典五十七年除河南蘭儀五縣臨河新灘地四千九百餘頃五十一年以前據通考以後本實錄嘉慶六年永定滹沱河竝溢畿輔九十餘州縣災有旨水衝沙壓應行減豁之處據實奏聞其有水

退泥淤轉瘠爲良者轉不必急行查辦是年減免直隸旗租十三萬三千八百餘兩次年再減二萬九千餘兩豁曹

單沙壓地八百頃有奇會又以文安多潦減額賦十之三

著爲令免曹單二縣沙壓地八百頃十三年以任縣環水村

莊照安州等處減賦例每年視水勢之大小奏聞次年免河南溫孟陝州漫口十一  
年沙壓地四百餘頃二十四年免山

西岢嵐保德二州缺額丁銀二千二百餘兩以上本仁宗聖訓謹

案皇朝通考於國用蠲貸門別爲細目曰賜復曰免科賜復者免復一時者也免科者永停輸納者也臣今以

列朝特恩及慶典有詔停罷者入蠲免篇而減浮賦豁

荒田永箸爲令者則入此篇誠見開國以來凡水濱坍  
荒衝壓之地與夫隄防占廢者鹹鹵飛沙漲涸不常者朝  
報荒則夕蠲賦其有租糧兩徵者賦浮而額重者一以上  
聞立時減免寬卹之政蓋史不絕書矣姑最舉其大者  
如右其它災蠲賑貸別爲篇

紀蠲免

我朝列聖以愛民爲家法偏災賑蠲外凡逋負之在  
民者與民糧食種之貸而未收者遇國家慶典或巡幸  
或軍興輒止勿責每庫藏稍充卽務推所有以益下於是  
又有普免錢糧輸免漕糧之舉累治重熙深仁厚澤不可

勝紀矣今臣祇就所見官書而約舉其數之最多者昔馬  
端臨作通考言宋以仁立國蠲租已責之事視前代爲過  
之歲不勝書姑撮其普及諸路與所蠲名目之大者臣之  
此篇竊取其義顧端臨又言由唐以來取民之制愈重逋  
欠之數日多故蠲貸之令不容不密本朝丁田賦役素  
輕二百餘年以來未嘗增及銖黍而詔書停放動至數  
千百萬緡從其薄施從其厚所以上培國脈下卹民依  
豈唐宋以來所可同年而語者哉世祖開國旣除三餉  
首免都城居民被兵者賦役三年以河南被寇賜免田  
租順治二年收山西除田租之半三年收江南免漕三之

一五年平湖廣免衡永辰靖等處錢糧嘗聞順治八九年間歲計出浮於入者八十餘萬十三年以後頻年增餉缺額至四百萬度支亦云絀矣而十一年免七八兩年逋賦十三年免八九兩年逋賦大抵逋欠在三年以前者輒與停免至聖祖初年猶沿以爲例康熙二年免順治十五八年以前民欠四年免十前民欠康熙十年聖祖東巡免蹕路所經今年租是爲蠲免之始不具載十九年以江南賦重免十二年以前民欠二十三年免南漕三之一二十四年免河南湖北今年租及來年之半又免直隸江南今年秋冬明年春夏之應納者二十五年免直隸四川貴州湖廣福建明年額賦及今年賦

之未入者次年江蘇陝西亦如之三載之內布惠一周後  
來普免之典實肇於此時海內大定 詔用兵以來錢糧  
未清者皆予除洗二十七年 上南巡免安徽去年租及  
江南積欠二百餘萬凡直省十七年以前逋欠漕銀米麥  
悉蠲除之二十九年免山東本年地丁三十年 諭曰各  
省歲運漕米向來未經議免時切軫懷今儲積之粟恰足  
供用應將起運漕糧逐省蠲免自三十一年爲始以次各  
蠲一年三十二年以粵蜀滇黔四省邊土饒瘠民生艱苦  
免明年地丁銀米三十五年免各省漕賦宿逋以軍興免  
陝西明年租賦次年免山西甘肅明年租三十九年免湖

廣甘肅各一年

甘肅免至  
四十一年

四十年免江蘇甘肅明歲地丁

四十一年免安徽及秦省河西明年田租次年免山東河南雲南貴州廣西四川六省明年租又免浙江山東明年

租四十四年免湖南北明年租並停帶徵宿負

諭嗣後

蠲免新糧之年舊欠俟次年徵納次年又以舊欠新徵勢

難兼納普免天下逋賦三百九十餘萬已入者作本年正

賦凡民欠賦糧閱數年卽蠲免一次其在一省一隅者尤

不可悉載四十七年免江南浙江人丁銀六十九萬又免

明年江南地丁四百七十餘萬浙江二百五十餘萬四十

九年 諭曰朕首方已閱七省民俗靡不周知而民所以

未盡殷阜者良由承平日久戶口殷繁地不加增產不加  
益今用不給理有固然明年爲康熙五十年原欲將天下  
錢糧一概蠲免廷臣集議恐各處兵餉撥解驛遞煩苦自  
明年始三年以內通免一周俾遠近均霑德澤三年中計  
免天下地丁糧賦新舊三千八百餘萬案二千一百餘萬此當是  
合舊欠計之與會典同 諭旨只三千  
浩蕩之恩實史冊所未有初稻穀例不入  
蠲而臺灣有穀無銀以巡撫黃秉中請竝除之五十二年  
免天下明年房地租稅一年兼除逋欠是年免山西河南  
陝西之西安等府今年田租五十四五年再免直隸田租  
五十六年免各省屯衛帶徵銀二百三十九萬漕項銀四

十九萬半除之時太倉之粟有餘 詔以陳粟四百三十  
餘萬石格外賞給官兵

此條見製文四集

御

是舉也與普免漕糧

征策妄阿

拉布坦

同爲曠典五十七年以西邊軍興

拉布坦

免陝甘明

地丁一百八十餘萬頻年供億大兵之地屢有蠲免事例

六十年所免之數與五十八年同

案

聖祖六舉

南巡再

詣盛京間

幸五臺以及秦豫翠華所指蠲減兼行 恩典尤難殫

述嘗讀漢文帝賜民田租詔歎曰蠲租乃古今第一仁政

下至窮谷荒陬皆沾實惠然必宮庭之上力崇節儉然後

可以行此

見御製文三集

又嘗論本朝自入關以來外廷軍國

之需與明代略相彷彿至宮中服用則以各官計之尚不

及當時妃嬪一宮之數以三十六年計之尚不及當時一年之數蓋在宥六十餘年一以恭儉爲本有漢文之寬仁而享國則再倍之厥後稱天而謚曰仁於虜仁矣世宗卽位以昌平六州縣爲聖祖每年巡幸之地及陵寢所經免雍正元年額賦時普免天下康熙五十年以前宿逋江蘇一省至八百八十萬據會典則一千一百六十五萬有奇六年免直隸明年起運銀四十餘萬福建逋賦三十餘萬七年以浙省未完舊欠踴躍輸將免本年額賦十之二計六十萬兩見會典時西藏苗疆甫平免甘肅四川廣西雲貴明年租又諭以國家經費已敷宜藏富於民於是次第

免各省額賦各四十萬以直隸首善之地山東被水之區  
特再免之甘肅地瘠又值軍興見會典八年九年免地丁次

年免糧草又次年免額賦二十七萬以贍之自十年平臺  
灣生番十一年剿雲南獮夷大兵所過復加優免十三年  
免雲南貴州及湖南沅州今年田租特 詔貴州被兵之  
處給復三年 高宗卽位 詔免天下田租先後免雍正  
十三年以前各省逋賦并及江南錢糧之官侵吏蝕者

寬政所及廓然更始令業戶計所免之數減半以惠佃農  
時黔蜀徵發山陵大工屢有蠲免令以奉 旨之日爲始  
已輸者准抵明年正賦二年全免甘肅錢糧陝西半之會典

四年免直隸錢糧九十萬兩江蘇百萬安徽六十萬十年  
諭曰朕臨御天下十年於茲撫育烝黎躬行儉約直省  
水旱賑濟多在常格之外如前年江南被水費帑金千餘  
萬朕思持盈保泰莫先於足民我 皇祖在位六十一年  
蠲租賜復之詔史不絕書曾將天下錢糧普免一次我

皇考勤求民瘼減賦寬征如甘肅一省正賦全行豁免者  
十餘年朕繼志述事欲使山陬海澨均沾大澤特將十一  
年直省錢糧通行蠲免廷議三年之內輪免一周計爲數  
二千八百二十四萬有奇總數見會典事例又見三十一年諭旨而諸不在  
蠲免之條者如甘肅番糧草束福建臺灣之粟米四川之

夷賦陝西西甯之馬貢浙江濱海之租穀租銀直隸固安霸州之旗戶屯糧奉天之米豆山西之本色兵餉河南之官莊義田廣東之官租學租遇屆免之年一律停其輸納北方五省惟甘肅尤爲瘠貧二十一年以後疊免連年額賦三十一年以京通倉貯有餘遵康熙三十年慶典次第免各省漕糧五年而徧初議七  
年後改又以漕糧內有例徵折色者令一體蠲免定蠲漕之處業戶亦  
令佃戶免交一半三十二年用兵緬夷蠲減滇省兩年額賦凡過兵之處各免三之一以爲例三十五年諭曰國家全盛內外度支有盈無絀府庫所貯月羨歲增因思天地只此生財之數與其多聚左藏不若

使茅簷蔀屋自爲流通且今年朕六十誕辰明年恭逢  
聖母八旬萬壽宜更沛非常之恩箸自三十五年爲始各  
省錢糧通行蠲免一次案是年蠲免計二千七百九十四  
萬有奇三十六年免臺灣供粟十一萬石四十五年同三十九年以金川用兵蠲  
免四川租賦四十二年以欲俟 聖母九旬萬壽再沛恩  
施今 仙駄升遐更無可推廣 慈仁之處令自戊戌年  
爲始四十普蠲天下錢糧仍分三年輪免計二千七百五  
十九萬有奇此條通考缺從會典事例補入四十三年 諭以庚子年七  
旬萬壽普免天下漕糧一次七年而徧四十四年四川軍  
需免官民賠帖三百八十萬定例河工例價外酌增銀兩

分年按畝攤徵四十八年 諭豫省辦理大工以來用銀  
千餘萬無非爲百姓保護田廬其酌增銀兩此次爲數較  
多而上次漫工尙攤徵未完朕臨御以來普免天下地丁  
者三次普免各省漕糧者二次不惜萬萬帑金又何靳此  
千餘萬金邪所有民間攤徵銀九百四十餘萬及上次未  
完九十餘萬加恩普行蠲免四十九年甘肅逆回滋事除  
今年租又豁歷年積欠一百六十餘萬民番應納銀米各  
數十萬五十二年臺灣軍興減免福建各屬田租五十五  
年 上八旬萬壽按年輪免各省錢糧二千七百七十萬  
有奇次年正月有普免天下錢糧四次之 諭臣謹案自

乾隆十一年以後普免凡四次若合六十年歸政大典  
詔書計之則五次矣五十九年以明歲屆六十年又普免  
八省漕糧五年而徧時以乙卯元旦日食上元月食有應  
天以實之諭蓋普免漕糧凡三次矣六十年各省積欠  
河南銀穀二百餘萬直隸旗租六十八萬有奇粵稽高  
宗之世省方時巡典尤數舉每謁兩陵及他典禮蹕  
路所經減額賦十之三以爲恩例遇稍歉則免茲不具  
書惟四十二年奉<sub>皇太后葬</sub>泰東陵  
免經行十二之五易州十之七爲特異若夫加恩之  
舉如謁祖陵於盛京則免奉天今歲田租及莊頭  
糧石減旗地芻糧之半十九年四十三年四十八年並同  
惟八年初謁祖陵通考止載

免莊頭糧石旗地額賦及讀  
製詩初集亦有免今年田租之舉  
年五十一年五十七年

幸木蘭十六年以後 幸五臺十一年二十六年四十六年 幸盤山四十七年五十年

皆賜復如例時並蠲逋賦 若 東巡闕里禋祀岱宗則免曲阜

歷城泰安額賦十三年二十一年三十六年四十一年四十九年五十五年 每回蹕淀

津復加 恩澤三十二年三十五年三十八年五十三年五十九年 幸嵩洛則免

祥符登封田租十五年 而 南巡恩澤爲最大 南巡之典

始舉於乾隆十六年免江蘇積欠二百二十餘萬安徽三十餘萬又以浙江并無積欠官民敬事急公特免本年地丁三十萬時亦以皇太后六旬大慶 積逋多蠲除惟一律浙省歲額完足占民俗質之語 再舉於二十二年免三省逋賦如舊並免江甯蘇杭三

府今年租豁竈課屯漕諸逋賦三舉於二十七年如二十二年例四舉於三十年五舉於四十五年六舉於四十九年竝如二十二年例古所謂遊豫補助未有若斯之盛者也抑臣聞宋人蠲租已責歲不勝書而其後郊賜不貲至於廢禮遂爲屯膏者之口實惟高宗享國愈益久膏澤愈益多而大農左藏之積亦愈益富初年部庫止三萬末年乃至七千餘萬故不以潤下而枯者河海是也不以惠下而貧者君上是也

高宗仁宗丙辰授受

恩詔普免各直省地丁錢糧甘肅民番有止徵糧草者并免之三年而徧時二聖同駐山莊免承德府明年租賦嘉慶元年夏湖

北教匪倣擾湖南貴州紳苗相繼蠢動 詔免二年湖南  
湖南兩省錢糧此條會典事例缺從仁宗聖訓補載並及川陝之被兵者  
二年夏解貴州南籠賜名興義府圍免滇黔廣西被兵州縣一

歲錢糧自元年盡七年凡楚蜀秦豫之被賊蹂躪及供億  
大軍者緩徵不足繼以蠲免蠲免不足繼以賑卹其數蓋  
累鉅萬四年 高宗山陵禮成以熱河爲 太上皇秋獮  
駐蹕之地竝經行畿內州縣悉免今年租又以 郊祀  
升配禮成普免六十年以前各省積欠緩徵各款七年免  
民欠旗租七十餘萬十年以初謁 祖陵免 蹤路經由  
州縣錢糧之半十三年 幸天津賜復如例十六年 幸

五臺免畿內宿逋及山西地丁之二二十三年再謁

祖陵免經過關外州縣承德廣甯  
錦縣甯遠本年及奉天所屬明年

租賦凡民欠悉除之其年十二月 諭 皇考臨御六十年

普免天下錢糧四次漕糧三次朕嗣位以來亦思廣施

閩澤大賚寰區始緣教匪不靖軍興孔棘繼以黃河泛溢

屢舉大工二年漕工漫口五年蕭陽宿泗漫工六年畿內  
水七年陽山縣賈家樓八年河南衡工十一年

河南溫孟十五年李家樓十六年黃河減濁漫工十八年睢工

十餘年間所費帑金踰數

十千萬國家財賦實有入不敷出之勢是以嘉慶十四年

朕五旬正慶未能普惠閩閩比年稂莠蕩除河流順軌以

正供所入謹制國用尙可無虞匱乏深念損上益下之義

將來府庫充盈仍欲覃敷渥澤明年朕六旬正壽宜先蠲除積欠俾免追呼臣伏讀斯旨惻然敦厚益所謂恩有

盡而意無窮也時普免各省宿逋獨四川貴州奏無民欠

詔免明年正賦十分之二用乾隆六十年例也

乾隆六十年普

免天下積欠奉山西四川湖南貴州廣西向無積欠免次年正賦十分之二

### 附記

時御史盛惇大奏請酌免見徵分數將舊欠照舊箸追上諭積年民欠因災緩徵者居其大半該御史所奏官侵吏蝕誠不能保其必無豈能因此不行惠民之政卽如賑卹災民從前亦屢有侵冒詎以此遂疑直省偏

災盡成虛妄將救荒之政槩行停止乎所奏紕繆不可行

紀災蠲

臣恭讀 本朝方策既隨事而爲之紀其間有紀之不勝紀而遺之不可遺者則擬爲表以廣收之卹災乃其一也凡災之待卹者曰水曰旱曰蝗曰霜雹曰地震曰火濱海者曰潮曰颶凡卹災有蠲賦有減徵有緩徵有賑有貸有免一切逋欠今詳具於表而約取 歷朝因災蠲賑事例別爲篇俾司牧者有所考焉 國初功令凡遇災蠲於起運存畱均減存畱不足卽減起運有司藉口無項可免使

民不沾實惠者論罪

順治六年定

凡災蠲州縣以蠲免之數刊

發免單已入者抵明年正賦違者以贓論

順治八年定

凡卹災辨其分數順治閒定被災八分至十分免十之三五分至

七分免二四分免一康熙十七年改五分以下爲不成災六分免十之一七分以上免二九分以上免三雍正六年

諭曰自古人君無不卹民之災而蠲免之數往往多寡

不同則時勢盈絀爲之不得已也如明洪武時凡水旱地方稅銀卽與蠲免成化時被災之地十分減免三分宏治時全荒者免七分九分者免六分遞減至四分免一而止我朝順治以來蠲數多寡不同旋減旋增皆因其時勢

爲之數十年來雖定三分之例然 聖祖仁皇帝深仁厚

澤愛養斯民或因偶有水旱而全蠲本地之租亦且無荒

歉而輸免天下之賦浩蕩之恩不可勝舉朕卽位以來清

理虧空剔除弊端數年之中庫帑漸見充裕用沛特恩將

蠲免之例加增分數見會典事例於是改十分者免七九分免

六八分免四七分免二六分免一至乾隆元年令被災五

分得視六分亦免一顧此有司奉行之常格耳臣稽歷

朝以來於報災重者常全行蠲免而未嘗拘拘於分數且

猶恐地方勘報不實故例外復有加分如康熙七年直隸

五十州縣水九分以上全除其租七分八分免四其年江

石渠餘紀卷一

三

南淮揚水例免一分後邳州等處加免二分至有災出非常饑連仍歲莫不蠲賑兼施務從其厚凡報災定其期限夏災以六月秋災以七月後以九月皆先以情形入告既報督撫親至災所率屬發倉先賑於四十五日內具題又康熙三年戶部言凡遇災之地先將額賦停徵十之三以待題免四年御史郝惟納言凡災地田賦免若干丁賦亦免若干時地丁分徵故 詔旨加詳後丁歸地糧凡有蠲免未有不地丁兼及者九年給事中莽佳言遇災蠲賦令竝免佃戶之租後又定業戶免三之例四十九年戶部議覆給事中高退昌

條奏時申嚴定例凡蠲免取里圖結狀送部科 恩旨下曰

州縣不卽出示或蠲不及數納不畱抵者照侵欺律上司

竝坐

康熙六年定

初輸蠲省分遇偏災則不再蠲惟甘肅於乾

隆三十六年輪免適有旱災令於次年按分補免

見會典

而

巡幸之地例免十之三遇賜雨不時則免十之五十之七

無常數凡偏災州縣按區圖村莊地畝別其分數不以閹

邑地畝通算益一邑之中有高下山川磽沃之不同爲牧

令者能視其民之飢飽如其家人辨其地之窪隆如其堂

奧而後恩澤所施無遺無濫竊以爲親民之官平日巡行

邑里周知土宜者上也臨事而不避勞苦躬自相度災分

者次也平日視百姓如途人臨事以吏胥爲耳目斯爲下

矣臣讀通考見康熙四十六年江南浙江旱免兩省明年  
丁銀七十萬賦銀三百八十萬糧四十八萬豁江蘇積欠  
銀六十餘萬米麥三十餘萬次年二省水再免明年地丁  
六百三十餘萬又按乾隆初年東南數被水如七年十一  
年十八年淹浸尤廣嘗令戶部會計江南蠲賑之數雍正  
十三年間凡免百四十餘萬乾隆元年至十八年計免銀  
二千四百九十餘萬糧米稱是時有言博施難繼者上  
乃作勵志詩以自勉見御製詩二集考 聖祖 高宗兩朝以  
普免輸免錢糧爲 國家大恩澤其偏災蠲免者史冊或  
不備書今姑舉一二事亦以見東西爲財賦所出其豐歉

關繫度支者鉅也 仁宗之世無普免而多災蠲嘉慶六年永定滹沱交溢畿輔被災者百餘州縣而頻歲東南兩河爲患尤劇蠲免之數莫得而詳恭讀 聖訓有一災而免及數省者如八年衛家樓漫口則河南封邱等七縣直隸長垣等三縣山東菏澤等十四州縣皆免錢糧有一災而免及數年者如十六年河南李家樓漫口則免虞城縣地丁一年高邑二年永城三年又免江南安徽之蕭縣五河地丁一年宿州靈璧二年碭山泗洲三年時以畿輔各淀積水未消令按年以淹涸情形上請計是年所免者安州三百頃新河二百頃隆平甯晉均八百頃各有奇其它

一省一隅不能悉數也如六年甘肅旱免積欠一百七十萬之類夫荒政十二首重薄征國家有詔蠲租必有務令實惠及民之語以臣所聞近日疆臣上計乃有急公花戶雖蠲免而亦輸將者是民之好義而又有餘力上供者邪抑有司不能奉承德意出納之吝致然也邪

紀免徭役

周禮以來無不受役之民周禮以後亦無不病民之役我

朝

聖

聖相承蠲除力役愛民之政實有度越前古

者

國初以從龍功首免八旗壯丁差徭先是旗民徭役頗多至是并糧

草布匹亦永停輸納除各省匠籍革河夫僉派之弊時建太和殿

塞封邱決河率用夫數萬皆優給工食而民不擾自定賦役全書用里甲之法編徵徭里銀以代役官爲雇募有司私派里甲私役部民之禁康熙元年給事中柯聳奏蘇松田役不均疏言因田起差古今之常法但人戶有消長田畝有盈縮所以十年編審則役隨田轉勞逸適均查一縣若干里每里十甲每甲田若干田多者獨充一名田少者串充一名各項差役俱甲長挨甲充當故力不勞而事易集獨蘇松兩府名爲僉報殷實不稽田畝年年小審脫換那移田歸不役之家役累無田之戶以致貧民逃徙請及今大造之時使田盡落甲役必照田庶役均而民便下

部議行六年御史戈英言州縣每年有輪直甲長凡催徵  
錢糧及衙門需用各費皆甲長承辦獨江西有提甲之弊  
見年追比已完復提次甲責成備辦廣信等府甚有連提  
數甲者累民已極請禁之事下巡撫董衛國匿不以聞乃  
嚴飭禁革蓋前明均役提編之弊政獨有一二存者至是  
乃盡革之也會典康熙十二年停河南僉派河夫十六年  
禁有司罰民修城垛凡民間供應自後以次  
止案本朝丁口之賦謂之丁徭銀亦曰徭里銀是丁與  
徭合也其因田起差之法則田與徭合也顧其時法制未  
定官或以雜派累民康熙末年捐社穀五石者准免本身一年雜派差徭民亦以詭  
寄避役康熙二十九年令紳衿田地與勢未能顚若畫一  
民人一例差役以多詭寄也勢未能顚若畫一

乾隆會典云雍正二年以冊存見於  
數按直省州縣均入田賦代輸

及雍正初丁歸地糧  
見於  
是丁徭與地賦合民納地丁之外別無徭役官有興作悉  
出雇募舉宋元以來力役之弊廓而清之竊謂堯舜之愛  
民官禮之立法無以尙茲休養生息雖百世可也  
臣考近  
代用民之力河工而外見河  
篇夫隸工城工亦其大者  
歷朝以來不特無公旬之令至民間自爲之事且或曲加恩澤  
如沿江隄岸例用民夫按糧均派康熙五十五年  
恩賞銀六萬兩以助民工  
雍正六年同雍正元年以山東連歲荒歉  
免挑濬運河歲夫動帑雇幕以工代賑  
高宗卽位 諭  
各處歲修工程如直隸山東運河江南海塘四川堤堰河

南沁河孟縣小金隄等工向於民田按畝派捐者悉令動用帑金時用帑十餘萬而省百姓數倍之累歲有工作且食其力焉其它借項興修久而恩免攤還者尤不可悉數至城工例用民力康熙三十二年修盛京城垣猶准於本處民夫取用至乾隆十年川陝總督慶復請捐廉修築城垣諭曰各官養廉原以資其用度未必有餘倘名爲捐修而實派之百姓爲弊更大不若名正言順以民力襄事之爲公也此議不准行自古有力役之征小民有赴功之義況城垣爲地方保障正所以衛民而使之安堵卽如人所居者廬舍耳而必環以牆垣此理易曉且官民原

爲一體上下所以相維今則漫無聯屬恐日久相忘卒有用民之事必且呼應不靈朕思修建重大工程小民力不能辦者國家自不惜帑金爲之經理至些小工程補葺培護使不致殘缺傾圮則小民力所能爲而有司所當善爲董事率者也 聖謨洋洋可謂義盡而仁至矣於是定各省城工千兩以下者酌用民力修築次年巡撫碩色又請千兩以下者令州縣分年修補土木小工酌用民力餘於公項支修得 旨頒行或曰使民者政之經受役者民之分免徭役是恩掩義也臣愚以爲欲復周禮之役法必先復周禮之鄉官而後可降而漢之嗇夫亭長猶足以爲治若

但使大司徒以旗致萬民而無鄉老鄉大夫州長黨正若而人者爲之治其徒庶之政令而又使後世之保正里甲辨其老弱征舍則不待智者而知其不可矣故古今異制政治異宜者多矣獨役法乎哉

### 紀河夫河兵

明初沿河設夫役三時疏濬修築冬又徵椿草銀正德間以按臣吳闇言罷河夫十之七官收其直嘉靖初歲役尙數十萬人皆近河貧民奔走窮年不得休息從御史譚魯言令上中人戶徵銀雇役後銀有餘而歲徵如故徐州呂梁二洪先因水涸陵險設夫二千四百餘嘉靖二十三年

黃河自西來注之漕輓順利人力甚省按臣陳其學請裁  
損洪夫以寬瀟陽民力萬歷閒科臣按臣屢陳河夫之苦  
請優其直并免衝決賠修之虐政禮部主事陳應芳亦言  
河工夫役州縣取之里甲里甲視家資爲出夫之等一家  
雇夫五名則月費十金鬻產賣子閭閻一空及夫至工百  
計索求致令逃去檄移雇補費復如前官徒有募夫之名  
而害歸於藉名者之家利歸於管工者之手此前明河夫  
僉派累民之大略也 國初兼行召募先從御史修鳳采  
言設直隸沿河隄夫以備修築又從總河楊方興請設臨  
墩堡鋪夫以護漕運此皆召募而給以工食者也順治九

年河決封邱起大名東昌兗州及河南丁夫數萬塞之此  
因工程浩大特行僉派而又協撥於鄰省者也僉派民夫  
勢不能不資地方之津帖惟按田起夫其制最善康熙初  
漕運總督林起龍濬淮安涇河闢七十餘里用山陽寶應  
二縣之力二十日而畢工總河靳輔大修歸仁隄令協募  
人夫以土夫工價抵納錢糧一時稱便蓋猶明初按田出  
夫之良法也康熙九年總河羅多以大修用夫三萬餘請  
於江南山東二省僉派協濟給事中張惟赤言部臣前主  
募夫之議原定每名日給銀六分請將僉派之夫一體議  
給於是雖大工僉派而實與召募等及鳳采爲河南巡撫

言河夫累民請停僉派按畝徵銀以爲雇值今會典言康熙十二年停河南僉派河夫如歲修雇夫每名月給銀二兩益自撫臣發

之而江南由東仍舊十六年靳輔大修全河初議日用夫

十二萬人令鄰省協募屢經議減猶日用三四萬人後工竣上言河工興舉無不勒之州縣派募里民用一費十臣奉命兩河竝舉日需人夫十餘萬若循派募之舊章必半壁號呼矣自易派募爲雇募多方鼓舞遂使大工告成而

民不擾蓋大工亦用雇募其制實自輔始次年以坊里派募人夫十人不得三四人之用乃裁減河夫設江南河兵

八營

此據職役考按兵制考康熙十七年只設四營時江南本立總河殆合河東四營計之耳其徧徵

河夫工銀初則解令河員募役旋以非所管轄恐致逃散  
仍令州縣雇夫解交初河臣于成龍襄勤於康熙三十一年任嘗請豁  
免民夫以工程浩穰議格河臣董安國康熙三十一年任因言黃  
運兩河險汎甚多若免民夫專責河兵恐致貽誤止請酌  
減民夫一二千名及成龍再爲總河康熙三十七年復代安國任又以  
歲夫苦累亟請變通言派夫一名約費銀二十兩老弱充  
數到工多逃計歲夫七千請每名量徵銀五兩編入正供  
徵解河工添設河兵三千餘酌量緩急分班搶護考國  
初河標兵僅三千名康熙初又裁減十之二而歲夫愈困  
其改編夫銀廣增兵額則始於輔而繼以成龍遂使民脫

僉派之苦而工獲修防之益乾隆二年定東南兩河兵爲戰二守八見揭<sup>帖</sup>

四十六年大學士公阿桂奏

南河二十一

河營額兵一萬五百東河三河營額兵一千七百多寡懸殊將兩河扣存名糧九百八十分添爲東河各汛實額案河工歲夫始出僉派後改徵銀召募至裁夫設兵乃役法之變耳臣愚以爲周禮用民之力族師帥四閭之吏辨其可任者州長帥而致之鄉大夫又辨其征者舍之以歲時入其書其時上下之間易知而易從後世舉一縣數萬數十萬之眾付之里甲保正數人以征舍爲市偶有興作耗國毒民而事不集卽有好義之民臨以明察之吏而號令

無素部署無法亦事倍而功半故古有以軍興法從事者  
非徒賞戮之亦以部署號令聯爲什伍乃易以趨事而赴  
功漢武起卒塞河而宣防之功成然則河夫之改爲河兵  
可謂變而不失其正矣今南河總督管轄本標中右二營  
淮揚河營淮徐河營葦蕩營船務營廟灣營佃湖營都額  
兵若干名東河總督管轄本標中左右三營濟甯城守營  
山東運河營黃河營河南懷河營豫河營都額兵若干名  
其營伍之分合兵額之增減別詳綠營兵制卷中

案新輔奏疏有云人夫一項除架船裝料鋪埽簽椿收  
放揪頭繩纜栽柳修柳巡查隄岸看守料物修補水溝

填塞狼窩獾穴等物俱係河兵力作至於繩纓打纜搬運  
草柳拉埽擡梯挑土幫修埽臺等一切雜作則用歲修  
人夫讀此可見河兵之作苦而歲夫之無裨實用

考張靄生河防述言河兵之議自陳潢

錢塘人

倡之略言

州縣歲夫俟修舉調發恐有後時額夫既有定數不如  
徵銀解工不時雇募免民夫起解守候之苦至河流衝  
險之處無間晝夜晴雨巡防方可不時搶救守隄夫役  
慮無節制情弛不免瀆思河工原比軍法請卽以軍法  
行之給食赴工之夫盡募爲支餉守汛之卒設官統之  
則節制旣有責成防禦庶無疎懈矣

顧棟高淮安府志營制敘淮郡爲黃淮二河貫注歷代用民夫塞決徵調動至數十萬 本朝設河兵及堡夫淮安建兩大閘而河營遂與漕營並重其人率皆駐宿河干熟諳水性平日不責以騎射之能而專司壠築之事每遇河工緊急合龍下埽不爽分寸雲梯硪築懸絕千仞當河濤決怒時持土石與水爭勝性命懸於頃刻惟責任專諳練熟故能奏功而無害此尤 本朝兵制之超出前代者也

紀科舉篇目

我 朝天聰崇德間卽有考試生員舉人之制各就所習

分滿洲蒙古漢文以試之順治開科沿前明舊制首場四書藝三篇經藝四篇次場論一篇表一道判五條試五經者竝作詔誥後場策五道時給事中龔鼎孳請用詩去策改用奏疏不許定磨勘試卷例首嚴弊倖次簡瑕疵前場以明理會心不愧先儒者爲合式後場以出經入史條對詳明者爲合式於是得雋者謂之中式初首場出題於經書分段拈籤順治十五年成會試始 欽命四書題其鄉試

欽命四書題始於康熙二十四年其年並欽定表題

康熙二年癸卯停止八股文減試一場首場以策二場以論表判尋禮部侍郎黃璣疏言不用經書爲文則人將置聖賢之學於不講恐非朝廷

設科取士之深意請復舊制許之自國初停五經中式之例至康熙三十六年丁丑四十一年壬午京闈竝有五經之卷特旨賜舉人竝令嗣後闈中備長卷以待能者別於額外取中以一二三名爲額乾隆十八年癸酉乃停五經中式時命方苞選錄四書文以爲程式二十一年移經文於第二場會試作表一道鄉試並論判去之尋易表以五言八韻唐律又於首場增作性理論論題初專用孝經後兼以性理太極圖說正蒙命題而統名之爲性理論屢頒諭旨釐正文體以清真雅正爲宗諭之曰制科取士首重四書文蓋六經精微盡於四子書非讀書窮理無以發先聖之義蘊今士子或故爲艱深或矜爲俳

儻偶有得售彼此仿效文風日下非細故也古人論文以  
渾金璞玉爲比未有穿鑿支離可以傳世行遠者四十三  
年 上詢大學士于敏中言近年風氣喜爲長篇乃定篇  
以七百字爲率然舊例本有逾五百五十字之禁康熙間  
改限六百五十字第日久漸汎濫耳次年 上以繙繹人  
員未諳蒙古語拘漢文字牽綴爲文竝 諭以科舉制義  
代聖賢立言雖古今時會不同而中國語言相沿未改無  
難會意追求乃今之時文朕覽之多不能改朕雖不喜作  
時文然於名家大家之文亦曾誦習其中如歸有光黃滔  
耀理精義正足供翫味何今之作者相戾若此文風遞降

說者比之江河曰下然聽其流而不返日甚一日伊於胡底嗣後作文者務宜沈潛經訓體認先儒傳說闡發聖賢精蘊務去陳言以求合於古人立言之道四十七年移律詩於第一場性理論於後場五十一年廷臣議准士子束髮受書五經原宜全讀鄉會試次場酌改五經各出一題惟明歲場期甚近恐邊遠未能驟習宋臣朱熹有各經分年試士之議請仿其法輪試一周再行並試自五十八年裁性理論五經并試其制至今未有以易

紀科舉加恩

國家以甲乙科取士三年大比得多寡疏數之中若因事

而加 恩澤則有加科有廣額有加科而兼廣額 國初  
海內初定需人其理用材既多取材惟恐不足於是加  
科及承平既久涵濡樂育士皆以科名爲榮而寒畯舍是  
無由自進於是 國有慶典則嘉惠士林 恩施稠疊而  
取士之數愈增期愈數亦所趨之勢也謹案 世祖丙戌  
平江南己亥收雲貴加科之典凡二 聖祖丁巳加四省  
鄉闈越五十二年癸巳 六旬萬壽乃再加鄉會試 世  
宗唯登極一加科逮夫 高宗重熙累洽 聖母 聖子  
竝登八徵丙辰再周 肇親 授受前後 恩典凡七舉  
行乾隆壬申 太后六旬辛巳七旬庚寅 上六旬辛卯  
太后八旬庚子 上七旬己酉 上八旬乙卯以踰

附六十年親舉

授

仁宗之世凡三舉

嘉慶庚申  
以上皇

大典合之登極凡七恩科

恩旨

勅仍

五朝加科之數也廣

已頒九旬加科

舉行後戊辰戊寅皆以

萬壽

此

額之典會試皆臨期由禮部請旨詳見登科錄惟雍正元二兩年不拘省分額數別取七十餘名皆令接入本榜乾隆元年續取落卷三十五人得同殿試此會試廣額之出於特旨者凡鄉試廣額以大中小省爲差順治八年增大省十五名餘遞減五名十一年甲午增順天十名餘以七名五名爲差康熙己酉辛酉乙酉皆如順治甲午例而減小省爲三名別加奉天一名雍正壬子增各省原額十分之一乾隆丙子復小省五名餘如舊例又案列聖

臨雍則加監生中額順治九年十五名康熙八年八名雍正三年十八名乾隆三年同五十年  
十五名嘉慶三年同

世宗以後每登極加科又增大省三十名餘以十名爲差而順天生員比大省南北監生比中省滿蒙漢生此小省此五朝廣額之數也若夫特旨所賜雍正四年令五經副榜及兩中副榜者皆爲舉人七年賜大學士蔣廷錫子蔣溥等十三人爲舉人洎乾嘉以來師臣舊學及大臣有名德勳勤者竝延其賞或賜舉人舉人賜進士而乾隆間校書供奉間有賜科巡幸所經召試高等輒賜中書舉人嘉慶間屢賜首報要案之貢監生員一體會試尤爲曠典云

附記

乾隆三十八年以四庫全書校勘之進士邵晉涵周永年余集舉人戴震楊昌霖尙無職任令總裁察看如果勤勉進士准與壬辰科庶吉士一體散館舉人一體殿試

紀滿洲科舉

滿洲科舉始順治八年吏部言 先帝在盛京作養人材已有成例今日正當舉行於是令八旗子弟通文義者取入順天府學合滿洲蒙古漢軍以三百人爲額鄉試取中百二十名清漢文隨其所習惟漢軍依漢人例初減篇數

後遞增如一壬辰乙未廷試滿洲進士各五十人別爲一榜初博士筆帖式皆得會試十一年停

十四年停八旗考試文藝限每佐領

下一人讀書用爲部院官

時竝停廢子入監康熙六年復考試與

漢科舉始同場同榜十五年又停旋復故蓋我世祖之

入關壘漿筐篚與力取天下者不同而其收三冀平諸藩

未嘗不藉八旗之師武臣之力故用兵之際不得不汲汲

於詰戎肄武及海內無事仍以文治爲先旋停旋復唯其

時而已自解額減半以後時有增減乾隆九年定鄉試舉

人四十一名爲定額進士本無定額康熙間取六名雍正

間漸增至二十餘名乾隆間遞減至四名嘉慶間約以十

人爲率繙繹考試始康熙十年令八旗監生考試授官雍正二年開滿洲繙繹科九年開蒙古繙繹科以理藩院官補用至乾隆四年始行繙繹會試以主事等官用宗室應試始康熙三十六年時以屬籍繁衍特闢進取之途而一  
行旋罷乾隆惟乙丑戊辰再舉是科初在國史館後歸貢院嘉慶辛酉以後乃與鄉會竝行爲常例初合爲一闈後改闈後蓋支屬日廣培養日深人材亦日盛至滿洲考試必先騎射則康熙二十八年給事中能泰所奏定云

紀進士

授官中額

進士授官之制 國初選庶吉士專由保舉雍正初設

朝考猶與保舉兼行乾隆二年御史程盛修言新科進士俱未經出任之人九卿等原不能深知不過就有志讀書可以造就者舉之行之既久或有冒濫於是罷保舉專以朝考次之初各省或分額選取以其半習清書後分選合選時有不同清書亦遞減其員數其敎習散館之制詳翰詹源流考中明制進士二甲以部屬與知州兼用國初定二甲五十名以前選部屬順治戊戌停止雍正七年己酉復令分部學習乾隆初以額外主事多銓補壅滯部議暫停初沿明制部屬外兼用中行評博自戊戌竝除外任中書一官舉貢例監皆得考授康熙六年御史李棠乃

奏停例監考試中書以進士考補五十二年定制專以畱京敎習進士補中書雍正初選新進士爲官學敎習乾隆初令期滿稱職得爲主事次以知縣用於是進士入部稍糾其

途矣設科之始屬各省漸隸版圖令三甲選知州推官知縣順治十五年吏部奏設科取士原爲授官治民向例二甲授京官三甲授外官今科除庶吉士外俱除外官京官有缺擇稱職者陞補試之以治民而後重任法尤近古康熙九年以推官已裁二三甲俱授知縣五十一年以進士選授知縣有刑名錢穀之責選翰林敎習文藝從事典禮並率同修書以作養之滿三年考試優等者入月選至乾

隆初年吏部奏癸丑丙辰進士候選者尙四百餘人銓補之途稍滯乃增月選班缺而後漸次疏通按進士之額每因選官遲速而爲之增減丙戌 龍飛首榜 詔增定額

至四百名順治凡八科惟丁亥乙未兩科稍不及額康熙二十一科率在二百人以內惟庚戌庚辰丙戌己丑至三百人雍正凡六科自百餘人漸增至三百餘人庚戌沈昌宇榜至四百六人爲 本朝進士最多之數乾隆二十七科初年亦三百餘人戊辰以後漸減五十四年己酉錢楷榜止九十六人是爲最少之數嘉慶凡十科元年取百四十八人後皆在二百人以上此段改從科場條例條例照題名碑較得其實初會

試分南北中卷取中康熙五十二年癸巳始分各省中額  
自是遵行無改其引 見以尖圈點記名

見於雍正元年諭旨

大

抵開國之際幽隱未盡出而懸缺以待人則蒐羅務廣及  
夫人材漸興兼收並蓄而設官祇有此數且法制既定冗  
濫復裁於是士有沈滯之歎則爲少取以疏通之夫多取  
所以備任使少取所以免積滯一張一弛與時偕行用人  
之法不越乎此今國學題名具在姑綴其大略如此

通考順治十六年己亥時以雲貴蕩平行  
恩科會試而無鄉試廷試朱錦

等三百七十六人賜徐元文等及第出身

條例缺

是科又通

考順治十二年秦試榜 廷試四百四十九人條例作

三百五十人當更考

紀 殿試 朝考

國朝策試進士賜及第出身皆沿前代舊制初射策於天安門外順治戊戌從禮部言改於太和殿丹墀雍正癸卯諭曰今年殿試天氣已寒恐硯池冰結箸在太和殿兩旁對策敕總管太監於殿內多置火爐初會試以二月則殿試在三月惟加科無常期如順治己亥以九月康熙癸巳以十月雍正癸卯甲辰亦以十月而策士殿中自是始乾隆初展會試於三月以待春溫而殿試間有至五月者後乃槩以四月二十五年諭曰廷試爲掄

才大典向來讀卷諸臣率多偏重書法於策文取無疵類而已敷奏以言爲拜獻先資如文義醇茂字畫端楷固爲及格之選若字在丙而文在甲視文字均屬乙等自當使之出一頭地嗣後務令取擇適中 敕於傳膳前一日將擬定十卷進呈帶領引見詳覈文品始定名次并定讀卷官爲八員初以十四員於 文華殿 傳心殿前後住宿初晨集暮散未定關防 是科拔畢沅第一次年又 諭曰讀卷各加圈點標識卽有參差不過上之適中中之適下其或相去懸絕必各存成見有高下其手之弊乃另派大臣覆看旋亦停止三十六年辛卯 恩科廷試邵晉涵等一百餘人 諭

以進呈十卷頌多規少且有語涉瑞應朕深爲不取乃擇黃軒爲第一四十六年辛丑 敕殿試交卷日入爲度以向來有至次早交卷者連宵達旦更長人倦故更爲定制罷其給燭自雍正癸卯甲辰以將選庶吉士於 殿試後加以 御試論詔奏議詩五題是爲 朝考之始時令九卿各舉所知又令同考得自稱推舉初新進士旣 殿試朝考復派王大臣驗別等第至乾隆丙戌 諭罷之

臨軒甄錄親視其材品以爲高下不特無前代吏部注官之弊而亦以豫防攀援之私古來用人莫公於此又按乾隆初年汪灑奏考試新進士令將本處當行之事各據所

見陳奏格於廷議矣乃 諭以古來帝王爲治不棄芻蕘  
況進士皆讀書之人於地方利弊或有確見今考試仍照  
舊出題若有願將地方事件敷陳者准據實條奏閱卷大  
臣擇其言可採者進呈朕覽

紀舉人授官

自順治二年肇行鄉試各省以次開科分天下爲十五榜  
雍正元年 敕湖南建立試院自是乃有十六榜定例子  
午卯酉年鄉試辰戌丑未會試 恩科以春秋並舉惟順  
治十六年己亥特行會試而無鄉試康熙丁巳特行鄉試  
而無會試時止分順天河南江南浙江四榜各以鄰省會

考十五名取中一人此創舉也 國初解額頗廣天下舉人一千五百三十四人十七年庚子乃 詔減半取中康熙丙子三十按省增十數名辛卯五十令各省五分加一

後閒又增加至乾隆九年甲子 詔十分減一以爲定額自是遵行無改時河南湖北廣東請增解額後廣東之瓊州湖北之施南廣西之鎮安泗城盛京之滿合請設專額部議皆愛惜慎重而不敢輕與夫取材之多寡原視用材之緩急而其始常患官多其後又患人多故 國家設科之意常以慎於取而急於用爲本舉人選官之制有考選有揀選考選因文藝而別其人才揀選初兼考試後以具

文罷之

康熙三十九年停  
據選舉人考試

案考選之法順治十三年內宏

文院以機務殷繁請舉貢考取撰文

中書康熙間舉人得就中書職候選

三十九年以人多缺少令改注它職乾隆二十六年從大學士蔣溥請於會試落卷別取中書一榜遇應取明通榜之

年更於中書外選取是年又於會試薦卷挑取學正學錄

尋改爲考選

五十五年停落卷挑取之例

其中書學正學錄嘉  
慶於歸班進士選用

慶初會試照鄉試例於落卷挑取謄錄敎習旋復考試教

習之例凡各館謄錄官學敎習舉人期滿以知縣敎職並

用此舉人考試授官之大略也舉人揀選知縣初定三科

以後唯就敎不限年後令遠省一科卽得揀選雍正初以

舉人揀選每逾三十年不得而遠省官多懸缺乃揀發雲  
貴川廣以知縣試用以知州同歸舉班五年令九卿各舉  
所知而舉人亦得自相舉乾隆元年雲貴川廣福建舉人  
照雍正癸丑例揀發各省試用又以舉班壅積需次至二  
十年 諭吏部籌議疏通尋部議捐納人員將次用竣以  
其缺盡歸舉人序選九年檢閱會試落卷以敎職用照雍  
正五年舊例  
其挑選之制初惟 恩科舉行十七年 恩科揀選  
以知縣敎職竝用其數大省四十人中小省以十人爲差  
是爲大挑之始三十年 諭曰舉人選用知縣需次每至  
三十餘年其壯歲獲售者既不得及鋒而用而晚遇者年

力益衰中夜思維籌所以疏通壅滯查每科中額一千二百九十名統十年而計加以恩科則多至五千餘人而十年中所銓選者不過五百人除會試中式外其曾經揀選候選者尙餘數千經久愈多隨成壅積而知縣員缺祇有此數缺少人多固必然之勢也不知者或歸咎於捐班之占缺捐班所選每歲亦不過三四十人見在捐班已停自無虞占缺即將來再議開捐知縣一條不必載入於是部議截取舉人督撫據實驗看并定就教及賞給京銜之例至次年丙戌大挑增其額大省百八十人  
中小省遞減旋令遠省挑十之六近省十之五四十六年改定無論省分遠近就人數

均挑是年始移其期於榜前自乾隆壬申以後每恩科則挑選嘉慶辛酉以後定六年一挑選至甲戌應挑以各省分發眾需次雜展至丁丑令嗣後以四科爲率而扣近三科以爲限制此又揀選之大略也今每科各省舉人凡一千二百餘人仍乾隆間定額益歷朝取士之增減與吏部選官之遲速可以參觀而互見云

### 附紀貢監

國初貢監內得考補中書外得考授知縣以下官歲四月彙試百人中取正印八人餘爲佐貳而副榜亦考授知縣案順治二年令各提學選拔文行兼優者送監肄

業是爲選拔之始九年吏部以貢生考定通判積八百餘員請改授布政司經歷理問等職康熙間定府州縣學選拔人數 詔十二年一舉雍正初六年一舉至乾隆仍復十二年之制初用爲知縣佐貳教官至戊戌兼用小京官優貢始雍正四年初令送部引 見 國初用人甚廣沿明制令貢監考職授官後遂相承不改乾隆五十六年軍機大臣議恩拔歲貢原有就職就教之階貢監在館充當膳錄可邀議敘均有選途而考職一途較捷請停止以息奔競於是罷考職之例

紀制科特舉

科目之外特詔舉賢古謂之制舉 本朝取士專以科目  
其不常舉者曰博學鴻詞科曰孝廉方正科若經學若直  
言及山林隱逸孝子老農雖明詔特舉而未立專科今附  
見焉康熙十七年 詔曰自古一代之興必有博學鴻詞  
備顧問著作之選朕機暇留心文翰思得博洽之士用資  
典學有學行兼優文詞卓越之人不論已仕未仕京外各  
舉所知朕將親試錄用於是次第舉送至京月給廩餼十  
八年 體仁閣集試詩賦 親選彭孫遹等五十人 命  
閣臣稽前代制科授官故事議上漢授官無常職晉上等  
授尚書郎唐制策高等特授尊官次等出身因有及第出

身之目宋分等五二二等皆不次用三等爲上等恩數比  
廷試第一人四等爲中等比第三人皆賜制科出身五等  
爲下等賜進士出身有 詔俱授翰林官時授侍講一人  
邵吳遠授侍讀四人湯斌李來泰施閏章吳元龍授編修  
十八人彭孫遹張烈汪霽喬萊王頊齡陸柔錢中鎧袁佑  
汪琬沈珩米漢雯黃與堅李鎧沈筠周慶曾方象瑛錢金  
甫曹未授檢討二十七人倪燦李因篤秦松齡周清原陳  
維崧徐嘉炎馮勛汪楫朱彝尊邱象隨潘來徐鉉尤侗范  
必英崔如岳張鴻烈李澄中龐煖毛奇齡吳任臣陳鴻績  
曹宜溥毛升芳黎騫高詠龍燮嚴繩豫而杜越傅山王方

穀以老賜中書放歸雍正十一年再舉是科乾隆元年以御史吳元安言增首場以經解史論次場詩賦論考試一等授編修五人劉綸潘安禮諸錦于振杭世駿二等授檢討五人陳兆崙劉藻夏之蓉周長發程恂庶吉士五人楊度沈廷芳汪士鋗陳士璠齊召南次年補試萬松齡張漢授檢討朱荃洪世澤庶吉士此詞科之略也 世宗登極

恩詔採古賢良方正與孝廉之稱特舉孝廉方正 賜

六品章服以備召用尋引 見用爲知州五十五歲以上者 知縣官後列聖嗣基竝沿爲 恩例與廉舉孝曠世一行蓋

其慎也 經學之舉始乾隆元年尙書楊名時疏薦進士莊

亨陽舉人潘永年蔡德峻秦蕙田吳拔貢生官獻瑞監生  
夏宗瀾七人 詔以爲國子監官十四年 詔曰崇尚經  
術有關世道人心若故侍郎蔡聞之宗人府府丞任啟運  
研窮經術近侍郎沈德潛學有本源今海內昇平研窮本  
業宗仰儒先者當不乏人柰何令終老牖下而詞苑少經  
術也大學士九卿督撫其公舉潛心經學者務擇純樸淹  
通之士稱朕意焉再 詔核實保舉得陳祖范吳鼎梁錫  
璵顧棟高四人 命將箸述呈覽授鼎錫璵司業祖范棟  
高年老不能來京給司業銜先是七年 詔曰古者諫無  
專官故進言之路廣三代而下始設官而責之以言然如

馬周陽城之起布衣爲御史其事尤可風也大學士九卿  
擇素所深知其人有骨鯁之氣直樸之風而復明通內外  
政治者不拘資格列名封奏量加錄用督撫於屬員中深  
知灼見可備糾繩之任者亦准奏聞時雖不顯立直言極  
諫之科而導之使言以決天下之壅蔽訓詞至爲深厚  
案 開國時 詔舉山林隱逸見於順治二年制書及科  
臣朱徵梁鋐奏疏順治二年 詔舉秦中山林隱逸并故明文武進士舉人十二年徵奏請飭督撫無論前代遺紳與山林隱逸果有才堪理民學足輔世者奏聞擢用十三年鋐疏略曰 皇上寤寐英才詔舉山林隱逸應聘之士自不之人然採訪未確有負盛舉如江南舉呂陽授監司未幾以贓敗山東舉王運熙授科員未有建明以計典去此輩豈眞抱匡濟之才不過爲梯榮之藉耳夫山林者何謂其遠於朝市也隱逸者何謂其異於

趨競也舉<sub>逸</sub>大典必得其人乃當其位新飭細加採訪若品行<sub>述</sub>倫或博洽經史或淹通禮樂或曉陰陽星<sub>緯</sub>或熟山林要害或智可籌<sub>兵</sub>才堪足國各就所長開送<sub>皇上</sub>臨軒親試量能授職云云乾隆二年又詔舉品行優長

<sub>山林隱</sub>

十五年憲臣魏裔介奏請舉孝子授官後屢

詔

察舉孝行雍正二年詔曰四民以士爲首農次之今士子讀書砥行學成用世國家榮以爵祿而農民勤勞作苦以供租稅雖寵榮非其所慕而獎賞要當有加其令州縣有司擇老農身無過舉者歲舉一人給八品頂戴此卽孝弟力田之遺意也今老農猶存其制而禮官之請旌四方孝行者無曠歲焉

紀武舉

本朝武鄉會試亦始於乙酉丙戌鄉試初分保定真定大同甘肅後乃歸并順天及各布政司

上下江初分後合

康熙開發

武舉各標効用弓馬嫻熟得補千把總官初隨幫千總猶

用明季世職子孫雍正初令以武舉銓補自順治乙未定

武舉照文進士殿試兼馬步射庚子上親閱射於南

苑康熙間於瀛臺紫光閣後間於暢春園其授官之制

國初一甲三名遞授參遊都司餘授守備乙未一甲授副

參遊擊皆令隨侍衛學習雍正元年恩科特授一甲爲

一二等侍衛二甲孔雀翎侍衛三甲藍翎侍衛五年以後

兼以營衛守備用自是遂爲定制謹案康熙四十九年以

鎮臣請頒武經 諭曰武經七書未必皆正所言火攻水戰皆虛文且符咒占驗適足啟人衰心欲另纂一書此時又非修武書之時大學士李光地奏曰令習武者讀左傳卽佳 上曰左傳浮夸昔人議之與其用詐僞無稽之言不若行王道不戰而敵兵自敗王道二字卽極妙兵法從古窮兵贖武皆非美事善戰者皆不得已而後用兵也

聖祖平三藩又親征漠北武功照耀前古而知王道爲極妙兵法推本於不得已而用之一言於虛至哉此世世臣子所當法守者也尋部議七書中孫吳司馬法議論近正定以命題試士又瀛臺閱射偶 親御弧矢所發皆中雍

正丁未集各省武舉於紫光閣觀入旗校射時親軍護軍  
開數石者萬八千餘人眾皆龍服其神勇若夫等之沿  
革弓刀石之旋停旋復與分園印好歸營銓敘之制則具  
於兵部條例云

紀薦舉

人臣之誼莫大乎以人事君朝廷紀綱莫先於進賢受上  
賞藏賢蒙顯戮開國之初順天巡撫宋權獻治平三策  
首廣羅賢才以佐上理薦故明薦遼總督王永吉乃詔  
廷臣各舉所知嗣以知舉多明季舊吏廢員未有肥遜逃  
名之士定舉主之法得人者賞駢繆連坐薦時止以履歷

上聞其才品所宜由朝廷定奪禁不得以雜流黜革  
之人充數畏避速坐減默不言者罪之順治末年停差巡  
按乃定各巡撫應薦方面有司佐貳教官員額初督撫間  
歲一薦舉康熙二年停專用三載考滿之法六年停考滿  
以給事中李宗孔言復薦舉與卓異竝行十八年都御史  
魏象樞舉清廉十人諭張沐陸龍其係廉能之員如直  
隸清苑江南無錫繁劇之地庶其才可以表見二十三年  
令部臣保開差俱以有才及謹慎倘有其人而操守難知  
對上曰清操如何可廢如郝洛居官甚好猶侵蝕錢糧  
魏象樞曾薦郝洛此事安能豫知但將有守之人舉出自

能効力尋九卿舉吏部郎中蘇赫范承勸江南學道趙倫  
揚州知府崔華而兗州知府張鵬翮靈壽知縣桂龍其復  
與焉四十年 敕總督郭琇張鵬翮桑額一作華顯巡撫

桑格華顯巡撫

彭鵬李光地噶禮徐潮薦道府以下知縣以上官勿計墨  
誤罰降勿拘本省鄰屬此又擇人而畀以薦舉之權者次  
年禁九卿母得保舉同鄉及任本省官旋限每人一年所  
舉母過數十人五十三年尙書趙申喬舉張應詔能耐清  
貧可爲兩淮運使疏內有爲郎中能耐貧苦爲知府不製衣服隨從數人之語 識曰  
清官不保貧富張伯行家道甚饒任所日用皆取諸其家  
隨從四十五人今以爲不清可乎一心爲國卽好官或操

守雖清不能辦事亦何裨於國蓋六計上廉而善能敬法不可偏廢世宗卽位諭曰知人則哲自古爲難朕藩邸不與朝臣往來大小官吏不能悉知今臨御之初簡用人才諸大臣久任股肱內而大臣以及閫曹外而督撫以及州縣或品行端方或操守清廉或才具敏練各具眞知灼見具摺密奏素日同僚共事或同鄉同年門生親戚子弟俱准保奏勿避嫌疑勿徇私黨勿沽名市恩勿輕聽風聞言過其實負朕諮詢之意又諭以有舉無劾毋得修  
不在文字之工不  
能書寫者面奏又命王大臣舉屬下人各總管舉內廷執事大員子弟屢諭羣臣以進賢勿避嫌退不肖勿避

怨四年又 諭曰從前曾諭督撫布按保舉密奏原以通  
省人才不少保舉二三人少僅一人各拔其尤自然精确  
乃竟有挾私妄舉及引見俱極庸陋非人臣事君之義因  
敕各再明舉一人不得雷同嘗以湖北藩缺 上思之  
數日不得其人令九卿密保益明保之制所以揚於王庭  
與眾共之至黨援聲氣不得不防其漸於是有密封啟事  
而人不知者斯謀斯猷惟我后之德亦古大臣寵利不居  
之義也又 諭薦舉之人日後毋迴護顧惜今日因賢能  
而舉日後因改易而參正見公正無私五年令京官翰林  
科道郎中外官道府學政以上各舉一人或舉貢監生或

山林隱逸果足備國家之用卽親戚子姪不必引嫌時薦賢之詔屢下憲廟綜核名實每觀所舉之人以決其心術之公私識見之明昧詔令切核賞罰必行見諭旨乾隆

二年以道府要職令督撫藩臬各密舉一二人次年令九

卿各舉所知露章啟奏又諭論人之道才品兼長固屬甚善但二者不可得兼才勝於品一時塗飾可觀而心志不誠根本不固將來必難於駕馭若品勝於才雖一時肆應不足而心術端方操守廉潔將來擴充歷練必能不愧循良觀人於心術之間實爲探本之論時明薦密保更進迭用後屢詔大學士保舉編檢堪勝知府者八年令侍

郎以上保舉堪任三品京堂者十三年尙書以上保舉堪勝侍郎者十四年旨又令各堂官保舉翰林科道部屬才堪道府者蓋薦舉之典外與卓異保薦內與京察相輔而行

附吏員

國初佐貳雜職等官由吏充選順治五年以懸缺尙多定實歷五年卽與考取尋御史王秉乾奏軍前委用吏員爲正印官非制部選有人卽繳劄以佐雜用康熙初分四等自正八品以下分班銓補雍正初定五年考滿之後勒同回籍聽選違者遣逐旋敕查吏員捐納知縣以上官令督撫結報優劣竝定倉書儒士得以從九

品未入用

附記幕賓薦舉舊例

雍正元年 諭各省督撫事繁勢必延請幕賓今之幕賓卽古之參謀記室凡節度觀察等使皆徵辟幕僚功績果箸卽拜表薦引彼愛惜功名自不敢任意苟且嗣後督撫所延幕客須擇歷練老成深信不疑之人將姓名具奏如効力有年果稱厥職咨部議敘尋部議勤慎無過者照職銜卽用無職銜者量給職銜特疏薦舉者優敘徇私議處

附記會推舊制

順治六年大學士洪承疇疏言平治天下在督撫提鎮  
得其人宜實行保舉連坐之法先令吏兵二部評注保  
舉再詢左右大臣而後用之有 詔督撫提鎮著內院  
九卿會推舊制督撫缺以侍郎布按推用十年 詔不  
拘品級從公推擇推舉不公科道糾參顧其時雖沿明  
制而用人亦不盡出於是故康熙八年從給事中張登  
選言一會推提鎮至十年遂停初順治九年令京官二  
品以上及宗丞通政大理俱由會推至是令將應陞轉  
各官開列具題請 旨於是用人之權歸於上惟外省  
藩臬需人間一奉 旨推舉二十四年 諭曰九卿或

不據實舉薦有此次將彼意中之人薦出冀下次相報者有薦其門生同年同鄉親友者會推理宜虛公豈可一二人專擅乃傳諭申飭五十一年遂盡罷之蓋會推之制與薦舉略同薦出於一人宜不可信而行之至今不廢者以兼聽竝觀終收得人之益會推詢謀僉同宜若可恃然大官臆決唱聲萬口一辭私滅公同伐異其弊無所不至明之末造可爲殷鑒三代以下欲旁招俊乂會推必不可常行在慎簡虛公之人畀以薦舉之權而已